

# Sulisoqarnermut akitsuut pillugu Inatsisartut inatsisaat

## Akitsuummik akiliisussaatitaasut

**§ 1.** Sulisitsisut il.il. kikkulluunniit aningaasarsiat A-t akileraarutaannik Aningaasarsianit akileraarutit pillugit Inatsisartut inatsisaanni § 76, tak. § 78, naapertorlugu unerartitsisussaatitaasut inatsimmi matumani aalajangersakkat naapertorlugit sulisoqarnermut akitsuummik landskarsimut akiliuteqartussaapput.

*Imm. 2. Akitsuummik akiliisussaatitaasunut ilaangillat naalagaaffik naalagaaffiullu suliffeqarfiutai.*

*Imm. 3. Sulisitsisut Kalaallit Nunaanni atortussiassat aatsitassanit pisut il.il. pillugit inatsit naapertorlugu aatsitassanik iluaqtiginninniarsinnaanermut akuersissuteqarfingineqarsimasut akitsuummik akiliisussaatitaanerat atorunnaassaaq tamanna pisinnaatitaaffeqalersumut akuersissummi allassimappat.*

## Akitsuutip naatsorsornera

**§ 2.** Sulisoqarnermut akitsuut, inuussutissarsiutinut atatillugu ilinniartitseqqittarnermi, sulisoqarnermi ilinniartitseqqittarnerit piginnaasallu ineriartortinneqarnissaasa aningaasalersorneqarnerannut ilaasoq akissarsiaritat katinnerisa 0,9 %-attut annertussuseqarpoq.

*Imm. 2. Akissarsiaritat katinnerat tassaavoq inuit Kalaallit Nunaanni tamakkiisumik akileraartussaaitaasut sulisussarsiarineqarsimallutik nammineerlutik sulinerannut aningaasanngorlugit akissarsiatut tunniunneqartut suulluunniit katinnerat, matumani ilanngullugit akissarsiat, feeriarnersiat, honorarit, iluanaarutinit kajumissaatitut tapisiat, kiffartulussinnarnavereeqqutisiat akiliutillu taakkua assigisaat.*

*Imm. 3. Akissarsiaritat katinnerannut imm. 1-imi taaneqartumut ilaapputtaaq siulersuisunut, ataatsimiititalianut, kommissioninut assigisaannullu Kalaallit Nunaanni angerlarsimaffeqartunut ilaasortaanermi ikiortaanermiluunniit akissarsiat.*

*Imm. 4. Akissarsiaritat katinnerisa imm. 2 malillugu naatsorsorneranni ilanngunneqassanngillat aningaasat sulisitsisumit aaqqissuussinernut, aningaasarsianit akileraarutit pillugit Inatsisartut inatsisaanni § 39 aamma § 40 taaneqartunut akilerneqartut.*

## Akitsuutip akilersinneqarnera

**§ 3.** Piffissaq akitsuummik akiliiffusoq tassaavoq qaammat.

**§ 4.** Suliffeqarfíup akitsuummik akiliisussaatitaasup qaammatit naaneri tamaasa, kingusinnerpaamillu qaammatip tulliuttup ulluisa ulluinnaasut kingullersaanni akissarsiat akitsuuusiivigineqartussamik katinnerat kiisalu taakkua akitsuutissaat akileraaruserivimmut nalunaarutigissavai.

*Imm. 2. Nunalunaaruteqarneq akileraaruseriffíup immersugassiai atorlugit pissaaq.*

**§ 5.** Akissarsiaritat akitsuummik akiliuteqaataasussat katinnerisa akitsuutitaat qaammatip tulliuttup ulluisa aallaqqaataanni akiligassanngussaaq, ulloq piffissaagallartillugu akilerneqarfissa kingulleq tassaalluni qaammammi akilerneqarfissaani ulluinnaq kingulleq.

*Imm. 2. Akiliineq pissaaq akileraaruseriffimmut.*

**§ 6.** Akileraaruseriffíup suliffeqarfík piffissaagallartillugu akiliuteqartanngitsoq, peqqusinnaavaa piffissaq qaammammit ataatsimit sivikinnerusumik nalunaarusiornissaa pissasoq.

*Imm. 2. Aamattaaq akileraaruseriffíup suliffeqarfík piffissaagallartillugu akiliuteqanngitsoq peqqusinnaavaa akiliiffissatut piffissaliussamit § 5, imm. 1-imí taaneqartumit sivikinnerusumik piffissaqarluni akileeqqullugu.*

**§ 7.** Suliffeqarfík akileraaruseriffimmut eqqunngitsumik nalunaaruteqarsimasoq, taamaalillunilu akitsuummik mikivallaamik akiliisimasoq paasineqarpat, aningaasat akiligassaalersut pillammik ernialiunneqarsimasinnaasut ilanggullugit peqqusinermiit kingusinnerpaamik ulla 14-it qaangiunneranni akilerneqassapput.

*Imm. 2. Suliffeqarfík akitsuummik angivallaamik akiliisimasoq paasineqarpat aningaasat akiliutaavallaartut utertinneqassapput.*

#### *Naatsorsuusiornermi aalajangersakkat*

**§ 8.** Akitsuummik akiliisussaatitaasup akissarsiaritat tunniunneqartut katinnerat, akitsuutip naatsorsorneqarnissaani kiisalu akitsuutip akilerneqarneranik nakkutilliinermi tunngaviusussaq naatsorsuusiugassaraa.

*Imm. 2. Naatsorsuusiorneq pillugu maleruagassat erseqqinnerusut Naalakkersuisunit aalajangersarneqarsinnaapput.*

#### *Allaffissornermi malittarisassat*

**§ 9.** Inatsisip matuma atuutsinneqarnissaai pillugu maleruagassat erseqqinnerusut Naalakkersuisunit aalajangersarneqarsinnaapput.

#### *Pineqaatissiinerit*

**§ 10.** Pillaammik akiliisinneqassaaq kinaluunniit piaaraluni mianersuaalliorujussuarluniluunniit:

- 1) Paassisutissanik akitsuutip nakkutigineqarnissaanut atugassanik eqqunngitsunik paasinerlunneqarsinnaasunlluunniit paassisutissiisoq imaluunniit paassisutissanik nipangiussiinnartoq.
- 2) § 4, imm. 1 aamma § 5, imm. 1-imik unioqqutitsisoq.

3) § 6, imm. 1 aamma 2 naapertorlugit peqqussinermik malinninngitsoq.

*Imm. 2. Malittarisassani inatsit naapertorlugu maledruagassiornikkut kinaluunniit maledruagassiani aalajangersakkanik piaaraluneerluni mianersuaalliorujussuarluniluunniit unioqqutitsisoq akiliisinneqarsinnaavoq.*

*Imm. 3. Imm. 1-im 2-miluunniit taaneqartut arlaat aktieselskabimit, anpartsselskabimit, andelsselskabimit, peqatigiiffimmit, suliffeqarfimmit imminut ingerlattumit, aningaasaateqarfimmit assigisaannilluunniit unioqqutinnejarpat inatsisit malillugit inuttut isigineqarsinnaasoq taanna akiliisinneqarnissamut akisussaatinneqarsinnaavoq. Namminersornerullutik Oqartussat, kommunimit imaluunniit kommunit suleqatigiiffiat unioqqutitsisimappat Namminersornerullutik Oqartussat, kommuni imaluunniit kommunit suleqatigiiffiat akiliisinneqarsinnaavoq.*

*Imm. 4. Akiliisitsissut landskarsip pisassaraa.*

**§ 11.** Naalakkersuisut inatsimmi matumani aalajangersakkanik unioqqutitsisoq nalunaarfigisinnaavaat suliassap eqqartuussinertaqanngitsumik naammassineqarsinnaaneranik, unioqqutitsisup unioqqutitsinini nassuerutigippagu akiliisitsissullu nalunaarummi taaneqartoq piffissaq aalajangersimasoq, qinnuteqarnikkut sivitsorneqarsinnaasoq nallertinnagu akilerumallugu akuersippat.

*Imm. 2. Nalunaarummut imm. 1-im taaneqartumut tunngatillugu aalajangersakkat eqqartuussisarnermi inatsimmi unnerluussinermik imaqtut aammattaaq atuupput.*

*Imm. 3. Akiliisitsissut piffissaq eqqorlugu akilerneqarpal imaluunniit aalajangiunneqarnermi kingorna akiliisitsiniarnikkut akilersinneqarpal qanoq iliuuseqaqqittooqassanngilaq.*

Aalajangersakkat atuutilersitsisuusut ikaarsaarutaasullu

**§ 12.** Inatsisartut inatsisaat ullormi 1. januar 2007-im atuutilissaaq.

*Imm. 2. Tassunga ilutigitillugu atorunnaarsinneqassaaq Inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisaat nr. 16 ulloq 23. november 1989-imeersoq (AEB).*

*Imm. 3. Taamaattorli Inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisaanni nr. 16 ulloq 23. november 1989-imeersumi maledruagassat maannamut atuuttut akiliutinut piffissamut 1. januar 2004-miit 31. december 2006-imut tunngasunut atuutiinnassapput, soorluttaaq akiliutit akilerneqarsimanngitsut suli akiliisitsiniarnikkut akilersinniarneqarsinnaasut.*

*Imm 4. Ilinniagaqarnersiutit pillugit Inatsisartut peqqussutaanni nr. 5, 14. november 2004-meersumi § 5, imm. 1-im oqaaseqatigiit appaat pingajuilu atorunnaarsinneqassapput.*

Namminersornerullutik Oqartussat, ulloq 2. november 2006

Hans Enoksen

/

Josef Motzfeldt

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut